

Uunga siunnersuut: Akissarsianit akileraarutit pillugit Inatsisartut inatsisaata allangortinneqarne ranik Inatsisartut inatsisaat nr. xx, ulloq xx.xxx 2018-imeersoq
(Aningaasaqarnermut Naalakkersuisoq)

Saqqummiussissut

(Aningaasaqarnermut Naalakkersuisoq)

Siullermeerinnineq

Matumuuna Naalakkersuisut sinnerlugit akissarsianit akileraarutit pillugit Inatsisartut inatsisaata allangortinneqarnissaanut siunnersuut saqqummiuppara.

Inatsisissatut siunnersuut aningaasarsianit akileraarutit pillugit inatsimmut allannguutininik iluarsiissutinillu arlalinnik imaqarpoq. Maannalu naatsumik pingaarnerit oqaaseqarfigitsiassa vakka.

Siunnersuut manna aqutugalugu Kalaallit Nunaanni isertitat pilersinneqartut, Kalaallit Nunaanni akileraaruserneqartarnissaat Naalakkersuisut pingaarnertut kissaatigaat.

Taamattaq siunnersuut nunat tamalaat akornanni akileraartarnermut tungasunik aallussinermut akileraarnaveersarnerullu millisinneqarnissaanut ataqatigiissillugu isigineqassaaq. Taamaammat nakkutigisanik nuussinernut uppersaasiinerit annertusineqarnissaannik siunnersuut imaqarpoq. Tassani assersuutugalugu suliffeqarfiit assigiimmik piginnittullit akornanni nuusserit pineqarput. Siunnersuutikkut Naalakkersuisut uppersaasiinernut maleruagassanik erseqqinnerusunik aalajangersaanissamut piginnaatinneqarput. Piginnaatitsissutikkut tassuunakkut malittarisassanik OECD-p transfer pricingimik uppersaasiinermut kaammattuutaanut naapertuuttunik kinguneqassasoq naatsorsuutigineqarpoq. Uppersaasiineq tamanna akileraartarnermut ingerlatsiviit suliffeqarfinnik nuussinernillu aarlerinaatitigut naliliinissamut periarfissinneqarnissaat kiisalu nuussinernut Kalaallit Nunaannut akileraarnaveersarnermut atorneqarnissamut aarlerinaateqarnerpaanut akileraartarnikkut nakkutilliinermik aallussilluni suliaqarnissamut periarfissiinissamik siunertaqarpoq. Uppersaasiisarnermik piumasaqaat namminersorlutik inuussutissarsiortunut annertuumik allaffissornikkut nammakkiissaaq. Taamaammat suliffeqarfinnut mikisunut uppersaasiinissamik piumasaqaatit annikinnerusut aalajangersarneqarput.

OECD-p kaammattuutai minnerpaaffittullu piumasaqaatai naapertorlugit suliffeqarfissuit nunani tamalaani ingerlatsisut nunamit nunamut nalunaarusiortarnissamik pisussaaffilerneqarput. Piumasaqaatini suliffeqarfissuit ukiumut katillugit 5,6 mia. kr-inik taakkuluunniit sinnerlugit kaaviiartitaqartut pineqarput.

Tulliullugu inuussutissarsiutigalugu umiatsiaararsorluni aalisarnermut aammalu takornariartitsineramik angallammillu attartortitsisarnermik inuussutissarsiornermik ingerlataqartunut atatillugu aquuterallannik nalikilliliinermi malittarisassat sakkukillineqarnissaat siunnersuutigineqarpoq. Siunnersuut naapertorlugu aquuteqaralassinermi akiliut tamarmiusoq ukiumi ataatsimi nalikilliliissutigineqarsinnaavoq. Taamaaliornermi inuussutissarsiutigalugu aalisartup aquuterallaajarnermini aquuterallannik taarsiinissamut periarfissagissaarnerulernissaa siunertaavoq.

Taamattaaq Kalaallit Nunaanni soraarnerussutisianik katersiviit nunatsinni ingerlatseqatigiiffinnit iluanaarutisianik pissarsiaminnit iluanaarutisianut akileraartarunnaarsinneqarput. Aalajangersakkakut ilaatigut Kalaallit Nunaanni soraarnerussutisianik katersiviit nunatsinni aningaasaliisarnissaannik kajuminnerulersinniarneqarput. Tamatumalu saniatigut aningaaserivinni soraarnerussutisianillu katersivinni soraarnerussutisianik katersineramik aqqissuussinerlut tunngasunut malittarisassat assigiilernissaat qulakkeerneqarpoq.

Naggasiullugu inatsisissatut siunnersuut tassungalu nassuiaatit innersuusutigissavakka.

Taama oqaaseqarlunga Naalakkersuisut sinnerlugit siunnersuut Inatsisartunut suliarineqartussanngortippara.